

東

嘉

錄

東嘉錄卷之四

朱子門人

葉說書 西山

葉味道初諱賀孫以字行更字知道温州人

見宋史  
儒林傳

少刻苦好古學師事朱熹試禮部第一時偽學禁行  
味道對學制策率本程頤無所避知舉胡紘見而黜  
之曰此必偽徒也既下第從熹於武夷山中學禁開  
登嘉定十三年進士第調鄂州教授理宗訪問熹之  
徒及所著書部使者遂以味道行誼聞差主管三省  
架閣文字遷宗學諭輪對言人主之務學天下之福

也必堅志氣以守所學謹幾微以驗所學正綱常以  
勵所學用忠言以充所學至若口奏則又述帝王傳  
心之要與四代作歌銘之旨其終又曰言宣則力減  
文勝則意虛從臣有薦味道可為講官乃授太學博  
士兼崇政殿說書故事說書之職止於通鑑而不及  
經味道請先說論語詔從之帝忽問鬼神之理疑伯  
有之事涉於誕味道對曰陰陽二氣之散聚雖天地  
不能易有死而無不散者其常也有不得其死而鬱  
結不散者其變也故聖人設為宗祧以別親疎遠邇  
正所以教民親愛參贊化育今伯有得罪而死其氣

不散為妖為厲使國人上下為之不寧于是為之立  
子洩以奉其後則庶鬼有所知而神莫不寧矣蓋諷  
皇子竑事也三京用師廷臣邊閫交進機會之說味  
道進議狀以為開邊浸濶應援倍難科配日繁餽餉  
日迫民一不堪命龐勲黃巢之禍立見是先搔其本  
無益於外也經筵奏事無日不申言之而洛師尋以  
敗聞於是人謂味道所奏無一言不開導引翼求切  
於君身旁引折旋推致於治道遷秘書省著作佐郎  
而卒訃聞帝震悼出內帑銀帛贈其喪升一官以任  
其後故事所未有也所著四書說大學講義祭法宗

廟郊社外傳經筵口奏故事講義

並宋史  
儒林傳

問在鄉如何讀書賀孫云少失怙恃凡百失教既壯  
所從師友不過習為科舉之文然終不肯安心於彼  
常欲讀聖賢之書自初得先生所編論孟精義讀之  
至今不敢忘然中間未能有所決擇故未有定見先  
生曰大凡人說要去從師然未及從師之時也須先  
自着力做工夫及六七分到得聞緊要說話易得長  
進若是平時不曾用力終是也難一頓下手見朱子  
語錄  
答味道書曰所喻既祔之後主不曾復于寢此恐不  
然向見陸子靜居母喪時力主此說其兄子壽疑之

皆以書來見問因以儀禮註中之說告之渠初乃不曾細看而率然立論及聞此說遂以為只是註說初非經之本文不足據信當時嘗痛闢之考訂甚詳且以為未論古禮如何但今只如此卒哭之後便除靈席則孝子之心豈能自安耶其後子壽書來乃伏其謬而有他日負荆之語今不見當時往還舊牘因便以他書考而論之如大戴禮諸侯遷廟篇云君及從者皆玄服則是三年大祥之後既除喪而後遷矣其詞但告遷而不言祔是既祔之後主復於寢而至此方遷于廟矣如穀梁云易檐改塗禮志更釁其廟則

是必先遷祖於太廟夾室然後可以壞釁其故廟而  
納祖考之主又俟遷祖考於新廟然後可壞釁其故  
廟而納新祔之主矣如左氏云特祀於寢而國語有  
日祭之文則是主復寢後猶日上食矣但穀梁所謂  
練而壞廟乃在三年之內似恐太遠禮志所謂釁廟  
而移故主乃不俟其廟之虛而遽壞之恐非人情左  
氏所謂祔而作主則與禮經虞主用桑者不合疑左  
氏所說乃當時之失杜氏因之遂有國君卒哭而除  
服之說皆非禮之正大率左氏言禮多此類也皆不  
足信而國語日祭月祀時享既與周禮祀天神祭地

示享人鬼之名不合韋昭又謂日上食於祖禰月祀于曾高時享於二祧亦但與祭法略相表裏而不見于他經又主既復寢而日祭之則其几筵未知當俟臨祭而後設耶或常設而不除也此類皆無明文更當詳攷又古者廟有昭穆之次昭常為昭穆常為穆故祔新死者於其祖父之廟則為告其祖父以當遷他廟而告新死者以當入此廟之漸也今公私之廟皆為同堂異室以西為上之制而無復左昭右穆之次一有逋邇而群室皆邇而新死者當入于其禰之故室矣此乃禮之大節與古不同而為禮者猶執祔



於祖父之文似無意義然欲遂變而祔于禰廟則又非愛禮存羊之意竊意與其依違牽制而均不免為失禮曷若獻議於朝盡復公私之廟皆為左昭右穆之制而一洗其繆之為快乎

見晦菴文集

省闈想甚得意奏名必在前列但尚未見後場題目不知主司意鄉如何要之得失已有定分人徒自為擾擾爾改字不若只就舊名之為安門生之禮若在高等恐例須謁見即不可廢若只在行間亦不必詣之也禮書未能得了而衰病日侵恐未必能究竟此事也漢卿必時相見四方更有何朋友在都下凡百

宜以謹密為上事了能一過此相聚否李敬子尚留  
此志尚堅苦不易得但看義理未甚明徹細密爾文  
集

賀孫辛亥以後所聞池錄七八九十十一朱子語錄

### 陳潛室

陳埴字器之永嘉人見周易會通

少穎悟久從朱氏子武夷所見超卓四方學者從游  
數百人尊為潛室先生規郡志

器之問嘗讀孟子求放心章今每覺心中有三病統  
籠不專一看義理每覺有一重似簾幙遮蔽又多有

苦心不舒快之意曰若論求此心放失有千般萬樣  
病何至於三然亦別無道理醫治只在專一果能專  
一則靜靜則明明則自無遮蔽既無遮蔽須自有舒  
泰寬展處這也未會如此且收斂此心專一漸漸自  
會熟熟了自有此意看來百事只在熟且如百工技  
藝也只要熟熟則精精則巧器之又問先生往時初  
學亦覺心有不專一否曰某初為學全無見成規模  
這邊也去理會尋討那邊也去理會尋討向時諸前  
輩每人各是一般說話後來見李先生較說得下有  
落說得較縝密若看如今自是有見成下工夫處看

來須是先理會箇安着處譬如人治生也須先理會  
箇屋子安着身已方始如何經營如何積累漸漸須  
做家計若見未有安着身已處雖然經營畢竟不濟  
事為學者不先存此心雖說要去理會東東西西都  
自無安着處孟子所以云收放心亦不是說只收放  
心便了收放心且收斂得箇根基方可以做工夫若  
但知收放心不做工夫則如近日江西所說只如守  
箇死物事故大學之書須教人格物致知則以至於  
誠意正心修身齊家治國平天下節節有工夫見朱  
子語

答器之書曰所示四條第一第三兩條得之但以公為仁似未精伊川先生明言仁道難言惟公近之非以公便為仁又云公而以人體之故為仁竊詳此意公之為仁猶言去其壅塞則水自通流然便謂無壅塞者為水則不可更以此意推之可見仁字下落也又中之為義固非專為剛柔相半之謂然當剛則剛當柔則柔當剛柔相半則相半亦皆自有中也試更思之如何

見晦菴文集

又答器之曰性是太極渾然之體本不可以名字言但其中含具萬理而剛理之大者有四故命之曰仁

義禮智孔門未嘗備言至孟子而始備言之者蓋孔子時性善之理素明雖不詳著其餘而說自具至孟子時異端蠭起往往以性為不善孟子惧是理之不明而思有以明之苟但曰渾然全體則恐其如無星之秤無寸之尺不足以曉天下於是別而言之界為四破而四端之說於是而立蓋四端之未發也雖寂然不動而其中自有條理自有間架不是儻侗都無一物所以外邊緣感中間便應如赤子入井之事感則仁之理便應而惻隱之心於是乎形如過廟朝之事感則禮之理便應而恭敬之心於是乎形蓋由其

中間衆理渾其各各分明故外邊所遇隨感而應所以四端之發各有面貌之不同是以孟子析而為四以示學者便知渾然全體之中而燦然有條若此則性之善可知矣然四端之未發也所謂渾然全體無聲臭之可言無形象之可見何以知其燦然有條如此蓋是理之可驗乃依然就他發處驗得凡物必有本根性之理雖無形而端的之發最可驗故由其惻隱所以必知其有仁由其羞惡所以必知其有義由其恭敬所以必知其有禮由其是非所以必知其有智使其本無是理於內則何以有是端於外由其有

是端於外所以必知有是理於內而不可誣也故孟子言乃若其情則可以為善矣乃所謂善也是則孟子之言性善蓋亦溯其情而逆知之爾仁義禮智既知得界限分曉又須知四者之中仁義是箇對立底關鍵蓋仁仁也而禮則仁之著義義也而智則義之藏猶春夏秋冬雖為四時然春夏皆陽之屬也秋冬皆陰之屬也故曰立天之道曰陰與陽立地之道曰柔與剛立人之道曰仁與義是知天地之道不兩則不能以立故端雖有四而立之者則兩爾仁義雖對立而成兩然仁實貫通乎四者之中蓋偏言則一事



專言則包四者故仁者仁之本體禮者仁之節文義者仁之斷制智者仁之分別猶春夏秋冬雖不同而同出乎春春則春之生夏則春之長也秋則春之成也冬則春之藏也自四而兩自兩而一則統之有宗會之有元矣故曰五行一陰陽陰陽一太極是天地之理固然也仁包四端而智居四端之末者蓋冬者藏也所以始萬物而終萬物者也智有藏之義焉有始終之義焉則惻隱羞惡恭敬是三者皆有可為之事而智則無事可為但分別其為是為非爾是以謂之藏也又惻隱羞惡恭敬皆是一面底道理而是非

則有兩面既別其所是又別其所非是終始萬物之  
象故仁為四端之首而智則能成始能成終猶元氣  
雖四德之長然元不生於元而生於貞蓋由天地之  
化不翕聚則不能發散理固然也仁智交際之間乃  
萬化之機軸此理循環不窮脗合無間程子所謂動  
靜無端陰陽無始者此也晦菴文集  
有禹貢辯洪範解王制章句木鍾集 郡志

潛室木鍾集

周易會通

徐先生

徐寓字居父永嘉人

見朱子語錄

庚戌五月初見先生于臨漳問前此從誰學寓荅自  
少只在鄉里從學先生曰此事本無嶢崎只讀聖賢  
書精心細求當自得之今人以為此事如何秘密不  
與人說何用如此問看易曰未好看易自難看易本  
因卜筮而設推原陰陽消長之理吉凶悔吝之道先  
儒講解失聖人意處多待用心力去求是費多少時  
光不如且先讀論語又問讀詩曰詩固可以興然亦  
自難先儒之說亦多失之某枉費許多年工夫近年  
於詩易略得聖人之意今學者不如且看大學語孟  
中庸四書且就見成道理精心細求自應有得待讀

此四書精透然後去讀他經却易為力

寓臨漳告歸稟云先生所以指教待歸仔細講求曰  
那處不可用功何待歸去用功古人於患難尤見得  
着力處今夜在此便是用功處

郡中元自出公牒延郡士黃知錄樵施允壽石洪慶  
李唐資林易簡楊士訓及淳興永嘉徐寓八人入學  
而張教授與舊職事沮格至是先生下學僚屬又有  
乞留舊有官學正有司只得守法言者不止先生變  
色厲聲曰郡守以承流宣化為職不以簿書財計獄  
訟為事某初到此未知人物賢否風俗厚薄今已九

月矣方知得學校底裏遂欲留意學校所以採訪鄉  
評物論延請黃知錄以其有恬退之節欲得表率諸  
生又延請前輩士人同為之表率欲使邦人士子識  
此向背稍知為善之方與一邦之人共趨士君子之  
域以體朝廷教養作成之意不謂作之無益美得來  
沒合殺教授受朝廷之命分教一邦其責任不為不  
重合當自行規矩而今却容許多無行之人爭訟職  
事人在學枉請官錢都不成學校士人先要識箇廉  
退之節禮義廉耻是謂四維若寡廉鮮耻雖能文要  
何用某雖不肖深為諸君耻之

並朱子  
語錄

原缺

孝親弟長等事皆吾所自得而行之者慮有照管不  
到時節當據守之而勿失則吾之所得者實矣依於  
仁則全其本心之德而不間於人欲之私生々之体  
自流行不息工夫至此亦云熟矣此三節自立脚大  
綱以至工夫精察如此忠道即夫子志學處以等級  
次第言爾據大略是貧而無諂富而無驕之類謂其  
能守也依仁如貧而樂富而好礼謂其不違仁也游  
於藝是行有餘力則以學文未知此說通否答曰此  
段看得好但所引貧富者不相似孝弟為仁之本章  
註謂仁者心之德愛之理顏淵問仁章又謂仁者心

之全德合二處推明其說未審當否心德則生道也  
蓋天地以生物為心故人得之以為心者謂之仁其  
體則同天地而貫萬物其理則統萬善而包四端論  
其名狀則冲和溫粹渾龐涵蓄常生々不死乃得謂  
之仁為此即乾之元在四時而為春者也以仁而主  
四者則隨其地分發為羞惡為辭讓為是非莫不各  
當其所若不以仁為主而以別箇為主則但見不相  
對副但見乖隔不順且天地失其所以為主而人亦  
不得其所以生者矣此所以言仁專一心之德者豈  
不以其無綱紀管攝之妙乎敬愛之理只從孝弟上



發明自孝弟而推原其本則惟有此理爾所謂以仁為孝弟之本是也孝弟是廣充其用則為仁民愛物之事所謂為仁以孝弟為本是也寓恐心之德以專言愛之理以偏言專言之本則發為偏言之用偏言之用則合於專言之本不可以小大本末二之也自仁道之不明也人惟拘於氣蔽於私欲則生有息而天理不行否隔擁塞不能貫通如人疾病血氣不運於四肢則手足頑麻不知痛痒而醫亦謂之不仁人有以体乎仁必無一毫之私得以間其生々之体使之流行貫注無有不達無有不徧然後為能全其心

之德愛之理也此顏子之克己仲弓之敬恕與聖人居處恭執事敬博學篤志切問近思等處正欲使工夫縝密也必磨洗蕩滌其私使無一毫之留所以喚此仁使之充長條達無不周徧則心德自全而仁斯在我矣伏乞嚴喻答云此段大意得之但愛之理未可以用言之爾使味之久當決洽自見得失也君子之道造端乎夫婦及其至也察乎天地蓋夫婦則情意密而易於陷溺不於此致謹則私欲行於玩狎之地自欺於人所不知之境人倫大法雖講於師友之前亦未保其不壞於幽隱之處倘知造端之重隱微

之際恐懼戒謹則是功夫從裏面做出以之事父兄  
處朋友皆易為力而有功矣答云本只是說至近處  
似此推說亦好天地之大也人猶有所憾恐非謂天  
能生覆而不能形載地能形載而不能生覆人猶有  
憾處只在於陰陽寒暑之或乖其常吉凶災祥之或  
失其宜品類之枯敗夭折而不得遂其理此雖天地  
不能無憾人固不能無憾於此也答云既是不可以  
望其全便是有未足處兩端謂衆論不同之極致都  
是就善說如斷獄一人以為當死一人以為當罰今  
酌其中而行之是也答云然所謂中非如子莫之所

執也鬼神之為德註云体物是其為物之体不知此  
体字是体用之体還復是體質之体荅云鬼神者氣  
之往來也須有此氣方有此物是為物之体也晦菴文集  
徐窩庚戌以後所聞池錄二十二十一饒錄四六朱子

語錄

### 徐先生

徐容字仁父永嘉人

見朱子語錄

仁父問知禘之說則理無不明誠無不格治天下不  
難如何曰天地陰陽生死晝夜鬼神只是一理能明  
祭祀鬼神之理則治天下之理不外於此七日戒三

原缺

東嘉錄卷之五

朱子門人

張氏門人附

林龍圖

林湜字正甫平陽人

文見水心集

為富陽尉虜亮之亂部弓手截隘處邑豪乘時販鹽  
行劫公捕擒之代歸教授明州朝廷會其勞改官知  
泉州晉江縣州分造戰船公曰負郭豈有羨錢耶何  
忍歛百姓將捨去諸番義公之為助其役舟先就而  
民不知滿秩攀留空一城通判南劍太守議官自賣  
酒公爭曰賣鹽已病矣又益以酒且民地俱萬戶也

今始自南劍他郡效之君不畏八郡民怨已乎守諱其功自為奏朝廷視無通判署穀之乃下公條上言者亦謂閩近瘴故二稅有酒錢而民自酤今創禁之非舊制也守奏遂格汀州賦輸無法吏多取自入為百姓患帥漕請均節之以委公公索其征有公庫鮓脯食次冊差出貼支等錢皆數千計他多此類守倅俸數倍矣小官薄復別貸以給公約其歲用增損適平省緡錢四萬還之民

紹熙元年遷監察御史公久官南方無中援既入朝名人善士一見如舊識相謂曰今士大夫去就常以

臺諫官賢否為卜是公格應入臺得如斯人者庶幾乎至是竟用公

故事臺諫官居同宅相愛助厚甚彈劾論諫必相叅審好惡指趣不少異曰所以共持綱紀公獨喟然曰吾不惟賢與善是親正人之愠於眾人是助好惡去取不以公論為歸而曰共持其綱紀也夫綱紀者豈臺諫為私之地歟他日見上奏曰陛下托股肱於宰執而除授多小人寄耳目於臺諫而彈擊多君子治亂之大無過此也執論移晷侍立舍人言於眾曰今日察院爭何事反覆不已也自是與其長不合矣時



小人知公意頗自為計公與同列三人論劾甚銳至  
一日罷數人內外皆聳方依公為重而上以覺察過  
數詔諭公：為殿試詳定官考直言者居第一而上  
不用及殿中侍御史劉德修下邇公曰吾可以去矣  
劉公蓋公所謂親而助之者也公奏直劉公不報錢  
之望知靜江府公再論之上罷之望出公提刑浙東  
宰執合前願少留不聽

移江西轉運判官免贛州科罰罷龍南安遠折變減  
興國淮衣絹南安聖節銀及水潦州縣窠名之在漕  
司者皆除之歲損數萬而漕計猶增於舊

孝宗崩上內禪公使金入辭首以奉親歡杜諛口為  
勸上俯聽首肯數四謂吏部侍郎彭龜年曰朕初即  
位未識群臣此老成重厚人也在道繫帶及國通名  
有未合者連却虜議至賜衣以其服被公公揮擲去  
虜人曰君命何慢也公曰宋正統相承群臣服視其  
品今易左衽有死而已爭辨甚久虜趣入謝公盛服  
如故虜不能屈復命上迎謂曰卿守禮甚堅國體不  
失朕所知也遷司農卿

慶元初韓侂胄始專國朝士多自引去呂祖儉上書  
爭之貶嶺外公見余丞相曰呂子約匆々南行柰何

叔世不宜有執奏收回大臣責也丞相可不勉乎語  
喧一時權近側睨

性淡泊散朗雖居官精敏遇事立斷而平居但教諸  
生誦說若不涉世故者於善惡賢不肖明白而尤護  
惜善類世所謂善人君子常欲以一身同其榮悴去  
留故議論多激發見忌於人以是齟齬廢斥而終不  
悔

朱公元晦既謫士諱其學公執弟子禮不變未歿數  
月猶走書問疑義云

並水心文集

正甫問祭如在祭神如神在曰祭先如在祭外神亦

如神在愛敬雖不同而如在之誠則一吾不與祭而他人攝之雖極其誠敬而我不得親致其如在之誠此心終是闕然

見朱子語錄

盤隱類稿十卷

水心文集

### 蔡先生

蔡舉字行夫平陽人

見朱子語錄

訓譽曰大凡學問不可只理會一端聖賢千言萬語看得雖似紛擾然却都是這一箇道理而今只就緊要處做固好然別箇也湏一一理會湊得這一箇道理都一般方得天下事硬就一箇做終是做不成如

莊子說風之積也不厚則其負大翼也無力湏是理會得多方襯簞得起且如籩豆之事各有司存非是說籩豆之事置之度外不用理會動容貌三句是自家緊要合做底籩豆是付與有司做底其事為輕而今只理會三句籩豆之事都不理會萬一被有司喚籩做豆若不曾曉得被他瞞又如田子方說君明樂官不明樂音他說得不是若不明得音如何明得官次第被他易官為商也得所以中庸先說箇博學之孟子曰博學而詳說之且看孔子雖曰生知是事去問人若問礼問喪於老聃之類甚多只是官名不

曉得莫也無害聖人亦汲汲去問郊子蓋是我不曉  
的須去問人始得因說南軒洙泗言仁編得亦未是  
聖人說仁處固是仁然不說處不成非仁天下只有  
箇道理聖人說許多說話都要理會豈可只去理會  
說仁處不說仁處便掉了不管子思作中庸大段周  
密不易他思量如是德性五句須是許多句方該得  
盡然第一句為主致廣大極高明溫故敦厚此上一  
截是尊德性事如道中庸盡精微知新崇禮此下一  
截是道問學事都要得纖悉具備無細不盡如何只  
理會一件

一日因論讀大學答以每為念慮攪擾頗妨工夫曰  
只是不敬只是常惺底法以敬為主則百事皆從  
此做去今人都不理會我底自不知心所在都要理  
會他事又要齊家治國平天下心者身之主也撐舡  
須用篙喫飯須用匙不理會心是不用篙不使匙之  
謂也攝心只是敬總敬看做甚麼事登山亦只這箇  
心入水亦只這箇心

蔡懋壬子所錄饒錄二十三

並朱子語錄

沈先生

沈憫字莊仲永嘉人

見朱子語錄

莊仲問尋常遇事時也知此為天理彼為人欲及到  
做時乃為人欲引去已却悔如何先生曰此便是無  
克己工夫這樣處極要與他掃除打疊方得如一條  
大路又有一條小路明知合行大路然小路面前有  
因物引着自家不知不覺行從小路去及至面前荆  
棘蕪穢又却生悔此便是天理人欲交戰之機湏是  
遇事之時便與克下不得苟且放過此湏明理以先  
之勇猛以行之若是上智聖人底資質不用着力自  
然循天理而行不流於人欲若賢人資質次於聖人  
者到遇事時固不會錯只是先用分別教是而後



行之若是中人之資湏大段着力無一時一刻不照  
管克治始得曾子曰仁以為己任不亦重乎死而後  
己不亦遠乎又曰戰戰兢兢如臨深淵如履薄冰而  
今而後吾知免夫小子直是恁地用功方得

沈憫戊午以後所聞池錄三十八三十九四十四十

一並朱子  
語錄

錢先生

錢木之字子山永嘉人

見朱子語錄

問承先生賜教讀書之法如今看來聖賢言行本無  
相違其間所以有可疑者只是不遂處研究得通透

所以見得牴牾若真箇逐處逐節逐段見得精切少  
間却自到貫通地位曰固如是今若箇箇看過只一  
處便自未曾理會得了却要別生疑義徒勞無益  
器之問中庸首三句先生因舉性者道之形体之語  
器之云若說道者性之形体却分曉曰恁地看倒了  
盖道者事物常行之路皆出於性則性是道之原本  
木之曰莫是性者道之體道者性之用否曰模樣是  
如此

木之丁巳所  
曹文肅  
池錄三十六  
並朱子  
語錄

曹叔遠字器遠温州瑞安人

規宋史文集

學于陳傅良登紹熙元年進士第久之李壁薦為國子學錄迂韓侂冑罷通判涪州後守遂寧營卒莫簡苦總領所侵刻相率稱亂勢張甚入遂寧境輒戢其徒毋肆暴曰此江南好官員也入朝為工部郎出知袁州以太常少卿召權禮部侍郎遇事獻替多所裨益終徽猷閣待制謚文肅嘗編永嘉譜識者謂其有史才

本傳

問器遠所學來歷曰自年二十從陳先生其教人讀書但令事理會如讀周易便理會三百六十官如

何安頓讀書便理會二帝三王所以區處天下之事  
讀春秋便理會所以待霸者予奪之義至論身已上  
工夫說道形而上者謂之道形而下者謂之器便  
有道不是兩樣湏是識禮樂法度皆是道理曰禮樂  
法度古人不是不理會只是古人都是見成物事到  
合用時便將來使如告顏淵行夏之時乘殷之輅只  
是見成物事如學字一般從小兒便自曉得後來只  
習教熟如今禮樂法度一齊散亂不可稽攷若着心  
費力在上面少間弄得都困了

語錄朱子

公適來說君舉要理會經世之學今且理會一件要

緊事如國家養許多歸明歸正及還軍年老者費糧  
食供之州郡困乏展轉二三十年都縮手坐視其困  
器遠且道合如何商量去之則傷恩養之則益困君  
壯資其力老棄其人是太不可須有箇措置器遠言  
鄉間諸先生常懷見先生之意却不待面會剖析使  
這意思合一曰某不是要教人步步相循却來入這  
圈套只是要教人分別是非教明白是的還他是不  
是的還他不是大家各自着力各自撐拄各一行到  
大路頭自有箇歸一處是乃不同之同乃所以為真  
同也

問先生所解致知格物處某即就這上做去如未能  
到貫通處莫也無害否曰何謂無害公只是不曾學  
豈有不貫通學得熟便通且如要去所在湏是去到  
方得若行得一日又說恐未必能到若如此怎生得  
到天下只有一箇道理緊包在那下撒破便光明那  
怕不通

並朱子  
語錄

周先生

周憫字伯莊永嘉人文公亦稱莊仲

見周易  
會通

戴鹽運

戴蒙字養伯永嘉人

見郡志

紹熙庚戌用戴勲牒改名埜應試遂中第調麗水尉  
棄官從朱晦菴于武夷再調鹽官丁父憂服除自念  
假途易名之非復舊名應鄉舉再試不中遂止楊守  
簡薦于朝黃度帥金陵起以寮幕外舅汪達援例以  
己澤改奏皆不就最後御史王穎叔言諸朝詔以初  
名復官子仔侗

郡志

戴勲為閣門舍人祖竹溪君與舍人有舊又同邑同  
姓故先父更名从櫛从土視舍人諸子行以試中國  
子舉明年余復榜唱第因其名而字子家

見戴仔家傳

學于朱文公文公以論語孟子中庸大學集註授學

者差一字輒正色譙責皆懾不敢難先父曰即如是買之書坊歸誦之爾非所為來也且學者不更折難安能有發文公曰今後唯許子家問先父亦隨疑明辨不蓄于心

初學于文公也以棄官之志質為文公曰子有父在若言于上必不免于罪是遺之憂又質于水心葉公公曰天下有不可改之過有不得不遂之非此類是也若之何也謀之平陽君以書譬止之先父曰某之身思之二十年矣朝得解之夕死無憾父母在時不敢為此者恐不免于罪而憂戚之也今養則不及憂



則無預于是而不為則無羞惡之心矣卒行其志郡  
上其事于朝既報免遂應鄉舉再試不中曰年可以  
止矣老于合溪之上浩如也

並家傳

侗也聞諸先人曰學莫大乎格物格物之方取數多  
者書也天地萬物古今萬事皆聚于書之多學者  
常病乎不能盡通雖然有文而後有辭書雖多總其  
實六書而已六書既通參伍而變觸類而長極文字  
之變不能逃焉故士惟弗學必先六書古之教者  
子生十年始入小學則教以六書六書也者入學之  
戶門學者之所同先也以爲小學者過矣由秦而下

六書之學遂廢雖有學焉者往來文辭傳會而不適  
於通至與曲藝小技下為曹伍故士益不屑而其學  
益不誦千載而下殆無傳焉夫不明於文而欲通于  
辭不通于辭而欲得于意是聾于律而議樂盲于度  
而議器也亦誣而已矣先人既以是教于家且欲因  
許氏之遺文訂其得失以傳于家塾而不果成小子  
惧先志之墜爰摭舊聞輯成三十三卷通釋一卷其  
所不知固闕如也

戴侗六書故  
序見元文類

黃先生

黃敬之名顯于

見朱子  
語錄

賀孫辭先生同黃敬之歸鄉赴舉先生曰仙里士人在外孰不經營偽牒二公獨迓還鄉試殊強人意

敬之問好仁惡不仁至我未之見也此不出兩端好仁者是真知得分明此身常在天理上下面說有能一日用其力及力不足者皆是正當分別天理人欲處着工夫又說里仁前面所說都是且教人涵養別須更有下工夫處曰工夫只是這箇若能於此涵養是甚次第今看世上萬物萬事都只是這一箇心又曰今夜說許多話最要緊所謂講學者誨此而已所謂學者學此而已敬之問一貫曰一貫未好便將忠

怨壓在上說因及器之夜來所問云曾子正不是守約這處只見聖人許多實行一一做工夫得到聖人度得如此遂告以吾只是從這心上流出只此一心之理盡貫衆理並朱子語錄

### 蔣先生

師友之門在同郡則葉君知道陳君器之蔣君叔蒙見戴仔家傳

叔蒙問韶盡美盡善武盡美未盡善曰意思自不同觀禮記所說武王之舞始而北出周在南商在北此便做箇向北意思再成而滅商須做箇伐商意思三

成而南又做箇轉歸南意思四成而南國是疆五成而分周公左呂公右又分六十四箇做兩處看此舞可想見樂音湏是剛不似韶純然而和武湏有些威武意思又問堯舜處湯武之時肯如湯武所為否曰聖德益盛使之自服爾然到得不服征伐也免不得亦如征有苗等事又如黃帝大段用兵但古人用兵與後世不同古人只趨將退便是羸那曾做後世樣殺人或十五萬或四十萬

見朱子語錄

問子貢通博明達非止於一能者如何却以器目之莫是亦有窮否曰畢竟未全備問夫子安仁顏淵不

違仁子路求仁曰就子路顏子聖人只是見處有淺深大小爾皆只是盡我這裏底子路常要得車馬輕裘與朋友共據他煞是有工夫了輕財重義有得事物事與朋友共多少是好今人計較財物這邊是我底那邊是你底如此見得子路是高了顏子常要願無伐善施勞顏子工夫是大段縝密就顏子分口口恰好了也只得如此到聖人是安仁地位大抵顏子無伐善施勞也只與願車馬輕裘與朋友共敝相以夫子安老懷少信朋友也與無伐善施勞相似但有淺深大小不同就子路地位更收斂近裏便會到無

伐善無施勞處就顏子地位更極其精微廣大便到  
安老懷少信朋友爾

朱子語錄

### 周郡倅

周去非字直夫行已族孫

見郡志

答直夫書曰甚矣學之難言也毫釐之差則流於詖  
淫邪遁之域生於其心害於其政發於其政害于其  
事可不畏與世固有不取異端之說者然不知其說  
乃自陷於異端之中而不自知此則學之不講之過  
也試舉天理人欲二端言之學者皆能言有是二端  
也然不知以何為天理而存之以何為人欲而克之

此未易言也。天理微妙而難明，人欲洶湧而易起。君子亦豈無人欲乎？而莫非天<sub>天</sub>命之流行，不可以入欲言也。常人亦豈無一事之善哉？然其所謂善者，天<sub>天</sub>必非人欲也。故大學之道，以致知格物為先，格物以致知，則天理可識而不為人欲所亂。不然，雖如異端談高說妙，自謂作用自在，知學者視之，皆為人欲而已矣。孟子析天理人欲之分，深切著明，如云：今人乍見孺子匍匐將入于井，皆有怵惕惻隱之心，非所以內交於孺子之父母也，非所以要譽於鄉黨朋友也，非惡其聲而然也。蓋見而怵惕惻隱形焉，此蓋天理。



所存若內交若要譽若惡其庸一萌其間是

欲矣雖然其惻隱蓋其苗裔發元爾由是而體其所以然則有以見大體而義理可窮也交要惡其聲亦舉一隅使學者推之爾上用之間精矣

舍則工夫趣味將有非言語可及者某愚而所從事者在此願高明細繹而反覆焉庶幾其有益也念無

以復來意不覺多言伏希悚戢

見張南軒文集

額外代答十卷陳氏曰永嘉周去非直失撰去非發未進士仕至郡守所記皆廣西重

日文獻通考

東嘉錄卷之六

後學朝佐編

名儒

薛常州

薛季宣字士龍永嘉人

見宋史儒林傳

始六歲伯父敷文閣待制弼收鞠之從弼宦將及見  
渡江諸老聞中興經理大略嘉從老校退卒語得岳  
韓諸將兵間事甚悉年十七起從荆南帥辟書寫機  
宜文字獲事於漑漑嘗從程頤學授之書宣既得既  
學於古封建井田鄉遂司馬去之制靡不研究謀畫

皆可行於時

儒林傳

金兵之未至也武昌令劉錡鎮鄂渚季宣白錡以武昌形勢直淮蔡而兵寡勢弱宜早為備錡不聽及兵交稍稍資季宣計畫未幾汪澈宣諭荆襄而金兵趨江上詔成閔還師入援季宣又說澈以閔既待蔡有破竹之勢宜守便宜勿遣而令其乘勢下潁昌道陳汝趨汴都金內顧且驚潰可不戰而屈其兵矣澈不聽時江淮仕者聞金兵且至皆預遣其奴而繫馬于庭以待季宣獨留家與民期曰吾家即汝家即有急吾與汝偕死民亦自奮縣多盜季宣患之會有伍民

之令乃行保伍法五家為保二保為甲六甲為隊因地形便合為總不以鄉為限總首副總首領之官族士族富族皆附保蠲其身俾輸財供總之小用諸總必有圃以唱射禁蒲博雜戲而許以武事角勝負五日更至庭閱之而賞其尤者不幸死者予棺復其家三年鄉置樓盜發伐鼓舉烽瞬息徧百里縣治白鹿磯安樂口皆置戍復請于宣諭司得戰艦十甲三百羅落之守計定訖兵退人心不搖樞密使王炎薦于朝召為大理寺主簿未至為書謝炎曰主上天資英特群臣無將順緝熙之具幸得遭時不能格心正始

以建中興之業徒僥倖功利夸言以眩俗雖復中夏  
猶無益也為今之計莫若以仁義紀綱為本至於用  
兵請俟十年之後可也

江湖大旱流民北渡江邊吏復奏淮北民多歎塞宰  
相虞允文白遣季宣行淮西收以實邊季宣為表廢  
田相原隰復合肥三十六圩立二十二莊於黃州故  
治東北以戶授屋以兵授田頒牛及田器穀種各有  
差廩其家至秋乃止凡為戶六百八十有五分處黃  
州合肥間並邊歸正者振業之季宣謂人曰吾非為  
今日利也合肥之圩邊有警因以斷柵江保巢湖黃

州地直蔡衝諸莊輯則西道有屏蔽矣

光州宋端友招集北歸者止五戶而雜舊戶為一百七十奏以幸賞季宣按得其實而劾之時端友為環列附托難越季宣奏上孝宗怒屬大理治端友以憂死季宣還言於孝宗曰左右之人進言者其情不可不察也託正以行邪偽直以售佞薦進人物曾非誦言游揚中傷乃自不意一旦號令雖自中出而其權已歸私門矣故齊威之霸不在阿即墨之誅賞而在毀譽者之用刑今觀朝廷非無阿即墨之誅賞奈何毀譽之人自若乎帝曰朕方圖之季宣又進言曰日

城淮郡以臣所見合肥板榦方立中使督視卒成  
之臣行過郡一夕風雨墮樓五堵溧陽尚壁闕而居  
巢庫陋如故乃聞有靡鏹鉅萬而成城四十餘丈者  
陛下安取此然外事無足道咎根未除臣所深憂左  
右近侍陰擠正士而陽稱道之陛下儻因貌言而聽  
之臣恐石顯王鳳鄭注之智中也又言近或以好名  
棄士大夫好名特為臣子學問之累人主為社稷計  
唯恐士不好名誠人人好名畏義何鄉不立帝稱善  
恨得李宣晚遂進兩官除大理正自是凡奏請論薦  
皆報可以冀允文諱闕久不樂之居七日出知湖州

會戶部以厝付場務錙銖皆分隸經總制諸郡束手  
無策季宣言於朝曰自經總制立額州縣鑿空以取  
贏雖有奉法吏思寬弛而不得聘若復額外征其強  
半郡調度顧安所出殆復巧取之民何以勝戶部  
譙責愈急季宣爭之愈強臺諫交疏助之乃收前令  
改知常州未上卒季宣於詩書春秋中庸大學論語  
皆有訓義藏于家其雜著曰浪語集並儒林傳  
公之學蒞事雖謹宅心唯平其燕私坐必危然立必  
巍然視聽不側欹雖所狎授言不以戲自著抄書及  
造次訊報字書不以行草几篋筆硯衾枕屏帳皆有



銘毫釐靡密若苦節然要其中坦々如也

見止齋文集

內郡發粟輸邊縣當餽信陽公部以往先是諸將出師部勒無法或侵苦之道瑾相望文吏董役者則又甚焉民見調輒與父母為死訣公語父老曰子弟相從者吾受其無咎皆憮然陽應既發隊伍次舍悉放行軍親與役夫同苦樂病者扶醫護視始輕所負劇則皆弛之增劇則以馬若輿載之病者未至隊長勿得安號令齊一道上擔肩相差如引繩無敢少蹉跌觀者相語曰此誰將軍部曲耶乃整肅如是既而知為武昌白丁相視歎息斯役也在行者千有八百

役罷死者一人跌傷者一人餘還畀其父母妻子如  
初約當是時諸公爭知之舉辟交至公一無所受見東萊文集

公行淮西持節勞來耄稚滿車下為之表廢田相原  
隰復合肥三十六圩立二十有二莊於黃州故治東  
北以戶頒屋以丁頒田二丁共一牛犂耙鋤鋤耨鎌  
具六丁加一鍤刀每甲輓軸二水車一種子錢丁五  
千稟其家至食新罷凡為戶六百八十有五分處合  
肥故黃適等而合肥羸故黃三戶戶授二室受田之  
丁合肥八百一十有五故黃六百一十有四會其錢

若米之費財二萬緡六千石流民已為大姓有者仍  
隸其主戶就撫之並邊歸正者振業之合三千八百  
餘戶始公以乾道七年十二月至淮西及命以明年  
之夏計道里往來與察邊郡檢麥田之屬專於田事  
者僅數月墾築治鑄斲削皆受成於公賦役省而功  
堅度可支數十年位置向背經緯條達民生所須不  
外索而足淮人謂耳目所未觀隆興以來經理兩淮  
受遣者且數十輩發御府金繒聽施置自便閱十年  
鮮有當上意者及公使事有緒恨得公晚道進官二  
等除大理正側席遲其至顧問紬繹奏請論薦皆報

可

自周季絕學古先制作之原晦而不章若董仲舒名  
田諸葛亮治軍王通河汾之講論千有餘年端倪蓋  
時一見也國朝程顥氏程頤氏張載氏相與發揮之  
於是本原精粗統紀大備門人高第既盡晚出者或  
驚於空無不足以涉事耦變識者憂之公之學既有  
所受博摭精思幾二十年百氏群籍山經地志斷章  
缺簡研索不遺過故墟廢壠環步移日以驗其蹟參  
繹融液左右逢原

少年豪舉既知學銷落不留省其私泊如也本於簡

易行於敬恕而學志強力以充踐之善類方共倚屬

公而公則死矣

並東萊文集

荅薛士龍書曰熹竊伏窮山誨服盛名之日久矣去年邂逅林擇之歸自宣城又能道餘論一二皆成已成物之大致區區益願承教於前願以憂患之餘屏跡田里而執事名聞方昭德業方起隱顯異趣私竊揣料未容遽遂鄙懷則亦悵然太息而已茲者林擴之之來乃知榮膺睿眷出試輔藩宣布之初譽處休洽深以為慰又蒙不鄙遠貽書翰所以告教甚悉擴之又以所聞相與推說皆平日所深欲聞者感幸之

至不容於心然而三復來教則有熹愚不敢當者二  
焉請陳其說而左右者察之熹自少愚鈍事之不能  
及人顧嘗側聞先生之餘教粗知有志於學而求之  
不得其術蓋舍近求遠處下窺高馳心空妙之域者  
二十餘年比乃困而晦始復退而求之於句讀文義  
之間謹之於視聽言動之際而亦未有聞也方將與  
一二同志一二友朋并心同力以從事於其間庶幾  
銖積絲累分寸攀躋以幸其粗知禮義之實而不為  
小人之歸而歲月侵尋齒髮遽如許矣懍然大惧日  
力之不足思得求助於當世有道之君子以速其進

而未得也執事乃不知此而友以講道教人之事期之此熹之所以不敢當者一也至於聖賢出處之義則亦略聞之矣顧以材智淺劣自知甚明又學無所成不堪酬酢故自十數年來日益摧縮不敢復有當世之念雖作來奉親之日急於甘旨之奉猶不敢自強其所不足以犯世患矧今孤露餘生形神凋喪懶廢無用益甚於前誠不忍復為彫纓結綬之計以重不孝之罪是以杜門空山甘忍窮寂以遂區區之志而庶幾或寡過焉執事又不知此而反以濟時行道之事責之此熹之所以不敢當者二也感服至意無

以為謝敢布腹心伏惟加憐察焉繼此僅未斥絕尚冀有以警悔之使不迷於入德之途則執事之賜厚矣他非所敢望也湖學之盛甲於東南而其湮廢亦已久矣蓋自熙寧設置教官之後不復得自擇師是以學校之政名存實亡而人材之出不復如當日之盛今得賢太守身為之師其必將有變矣然竊嘗讀安定之書考其所學蓋不出乎章句誦說之間以近歲學者高明自得之論校之其卑甚矣然以古準今則其虛實淳漓經重厚薄之效其不相逮至遠是以嘗竊疑之故因垂問之及而請質焉因風見教及此



幸甚又聞慶曆間取湖學規制行之太學不知當時  
所取果何事也求諸故府必尚有可攷者得令書吏  
錄以見賜則又幸甚相望之遠無由造前請益所欲  
言者何啻萬端遥想郡齋之間伏帟不勝引領見晦  
文集

熹屏居窮陋幸無他苦而涉春以來親友喪亡弔問  
奔走不得少安殊無好況此外無足言者誨諭諄復  
仰荷不鄙之意然無可不可之教則非初學所敢自  
期而待禮而應者尤非衰陋所敢萌意也區區之懷  
前書蓋已盡之矣萬一諸公終不察則不過恭俟嚴

譴而已無他說也蒙愛念之深而其問頗有未相悉者故敢及之然不足為外人道也垂諭湖學本未不勝感嘆而所論胡公之學蓋得於古之所謂洒掃應對進退者尤為的當警發深矣竊意高明所以成已成物之要未嘗不在於此而廣大精微之蘊其所超然而獨得者又非言之所能喻也跼伏之蹤永由承教於前徒切嘆仰儻不棄外時得與音以鞭策之實為萬幸而來教之云倒置已甚讀之愧汗跼蹐不知所以自容萬望矜察自此書來有訪死生之外削去虛文直以道義啓告誘掖此真區區所望於門下者

鄙懷慙，亦得無所慚憚而悉布之以求藥石之誨

不審尊意能容而聽之否

晦菴文集

薛季宣論語小學二卷

見宋史藝文志

薛常州地理叢攷一卷

藝文志

春秋經解指要共十四卷陳氏曰知常州永嘉薛季

宣士龍撰指要列譜例於前其序專言諸侯無史天

子有外史掌四方之志而職於周之太史隱之時更

周歷而為魯史季宣博學通儒不事科舉陳止齋師

事之季宣死當乾道九年，四十其為此書實紹興

三十二年蓋甫二十歲云

見文獻通考

風后握奇經一卷陳氏曰薛季宣校定自晉馬隆三百八十四字續圖三百十五字合標題七百字又有馬隆讚述多所發明并寫陣圖於後馬隆本奇作機

見文獻通考

薛士龍書解多於地名上有工夫

見朱子語錄

昔朱子在時永嘉之學方興意氣之軒昂言辭之雄偉自非朱子孰足以當其鋒哉自是以來以功業自許者足以經理于當世以詞章自許者足以風動于斯文至于六經之傳註得以晚畧凡近直造精微如薛常州春秋等書實傳註之所不可及而足以發明

于遺經者也山川文物之美遺風流澤之傳彬彬然  
濟然誠杞梓之茂林而鳳麟之靈囿也學道園錄  
季宣之奇博而有得於經道園學古錄

鄭龍圖弟景元

永嘉二鄭公長曰伯熊字景望季曰伯英字景元水見  
心文集

大鄭公恂少而德成經為人師深厚恂懽無一指  
不本於仁義無一言不闕於廊廟而景元俊捷果決  
論事憤發思得其志則必欲盡洗紹聖以來弊政復  
還祖宗之舊非隨時嘿苟為祿仕者也

景望徇道寂寞視退如進官至宗正少卿而止初景  
元中進士第第四人少卿喜而笑曰子一日先我矣  
然既任秀州判官遂以親辭然其身二十餘年不復  
仕朝廷亦卒不徵用何者諸公貴人知其才大氣剛  
中心畏之方以其自重不浪出無能害已為幸而不  
暇以廢格科目摧折名士為已責故也豈不悲哉夫  
孔翠鳳鸞矜其華采顧景自耀為世珍惜是既然矣  
若夫蛟龍之興雲雨則雷電皆至雷霆對百里豈區區  
然露小技銜細巧而已哉

昔周恭叔首聞程呂氏微言始放新經黜舊疏挈其

傳倫退而自求視千載之已絕儼然如醉忽醒夢方  
覺也頗益衰歇而鄭景望出明見天理神暢氣怡篤  
信固守言與行應而後如今人之心可即於古人之  
心矣故永嘉之學必兢省以禦物欲者周作於前而  
鄭承於後也

並水心  
文集

永嘉鄭伯熊薛季宣皆以學行聞而伯熊於古人經  
制治法討論尤精

觀宋史  
儒林傳

示諭明道程文不必見於正集考求前比固多如此  
然先生應舉時已自聞道今讀其文所論無非正理  
非如今世舉子何時徇俗之文乃有愧而不可傳也

愚意只欲仍舊次第不審台意以為如何答鄭景望書見晦菴

家祭禮三策并上不知可補入見板本卷中否若添入即孟說徐潤兩家當在賈頊家薦儀之後孟為第七徐為第八而遞僭以後篇數至政和五禮為第十一而繼以孫日用為第十二乃以杜公四時祭享儀為第十三而遞僭以後至范氏祭儀為第十九又於後序中改十有六為十有九仍刪去孟說徐潤孫日用七字不然即存舊序而別作數語附見其後尤為詳實不審尊意以為如何更俟誨論也



跋鄭景望書呂正獻公四事曰右申國呂正獻公四  
事見其家傳而故建甯太守鄭侯書之齋壁以自警  
者也侯書此時已屬疾間不兩月而終啓手足時清  
明安定執禮不懈如常日是足以驗其平日學力果  
能踐斯言者非一時偶書壁屋而已也夫呂公之行  
高矣其可師者不止此鄭侯亦無不學顧豈舍其大  
而規規於其細如此哉誠以理無巨細精粗之間大  
者既立則雖毫髮之間亦不欲其少有遺恨以病道  
體之全也侯之莫府趙君彥能將撫刻置府學以視  
學者而屬書其本末意不得辭也侯名伯熊字景

望永嘉人其為此邦號令條教必本於孝弟忠信學者傳之淳熙辛丑秋八月乙巳朔旦州民宣教郎新提舉江南西路常平茶鹽公事朱熹謹書

跋鄭景元簡曰六經紀載聖賢之行事備矣而於死生之際無述焉蓋以是為常事也獨論語檀弓記曾子寢疾事為詳而其言不過保身謹禮與語學者以持守之方而已於是足以見聖賢之學其所貴重乃在於此非若浮屠氏之不察於理而徒以坐亡立脫為奇也然自學者言之則死生亦大矣非其平日見善明信道篤深潛厚養力行而無間夫亦孰能至此

而不亂哉今觀鄭君景元所報其兄龍圖公事亦足以驗其所學之正而守之固矣所謂朝聞道夕死可矣者於公見之因竊書其後以自警又將傳之同志相與勉焉淳熙辛丑秋八月乙巳朔丹陽朱熹書

並  
集  
卷  
文

師儒輔導之官舉天下皆以為莫宜於公而公亦庶幾出其一二以上論三代之英及舉手之少異已多言之足懲雖空國之較寧有志之竟成將所存之高而事不下接抑道之興廢不可以人力為憑耶

見

同甫  
景元  
鄭  
文

嗟長公之山立儼獨矜於細行蔚羽儀於廟廊樹後

學之審訂越仲子之膚揚慨砥節於清勁不克詘於

崔嵬無幾微於蹭蹬

祭鄭景元母夫人文並龍川文集

公及從渡江諸老尚有典刑之學本之躬行加之講

肄析義利於秋毫兼博約而獨詣

龍圖經明行脩名重天下南渡以來張呂之比而景

元潔廉忠信邁往而絕出譬之天球琬琰和弓垂矢

燦然房中重英襲美

並見止齋文集

鄭伯熊集三十卷鄭伯英集二十六卷

見宋史藝文志

伯熊六經口義拾遺慈語若干卷皆究極本原達於

事物記聞若干卷前輩楷模及時人美惡凡涉理道

者畢載

見郡志

鄭景望集

三十卷陳氏曰宗正少卿永嘉鄭伯熊景

望撰

見文獻通考

歸愚翁集二十六卷陳氏曰秀州判官鄭伯英景元

撰近世學者推二鄭伯熊紹興乙丑進士自隆興初

館職王府東宮官至少司成宗正卿用矣每少不合

輒乞去卒於建寧守伯英癸未甲科第四人以親養

三十年不調竟不出二人皆豪傑之士也

文獻通考

東嘉錄卷之七

名儒

陳文節 止齋

陳傅良字君舉温州瑞安人

見宋史儒林傳

初患科舉程文之弊思出其說為文章自成一家人  
爭傳誦從者雲合由是其文擅當世

儒林傳

當是時永嘉鄭伯熊薛季宣皆以學行聞而伯熊於  
古人經治法討論尤精傅良皆師事之而得季宣  
之學為多及入太學與廣漢張栻東萊呂祖謙友善  
祖謙為言本朝文獻相承條序而主敬集義之功得

於棧為多自是四方受業者愈衆登進士甲科教授  
秦州參知政事龔茂良才之薦于朝改太學錄出通  
判福州丞相梁克家領帥事委成于傳良傳良平一  
府曲直壹以義強禦者不得售其私陰結言官論罷  
之後五年起知桂陽軍光宗立稍遷提舉常平茶鹽  
轉運判官湖湘民無後以異姓為嗣者官利其貲輒  
沒入之傳良曰絕人嗣非政也復之幾二千家  
除吏部員外郎去朝四十年至是而歸鬚髮無黑者  
都人聚觀嗟嘆號老陳郎中傳良為學自秦漢三代  
以下靡不研究一事一物必稽於極而後已而於太

祖開創本原尤為潛心及是因輪對言曰太祖皇帝垂裕後人以愛惜民力為本熙寧以來用事者始取太祖約束一切紛更之諸賂上供歲增于祥符一倍寧宗重修上供額頒之天下率增十數倍其他雜餉則熙寧以常平寬剩禁軍闕額之數別項封椿而無額上供起於元豐經制起於宣和總制月椿起於紹興皆迄今為額折帛和買之類又不與焉茶引盡歸於都茶場鹽鈔盡歸於推貨務秋苗斗斛十八九歸於綱運皆不在州縣州縣無以供則豪奪於民於是取之斛面析變科敷抑配賦罰而民困極矣方今之



患何但四夷蓋天命之永不永在民力之寬不寬耳  
豈不甚可畏哉陛下宜以拯民窮為己任推行太祖  
未泯之澤以為萬世無疆之休且言今天下之財竭  
於養民而莫甚於江上之軍都統司謂之御前軍馬  
雖朝廷不得知總領所謂大軍錢糧雖版曹不得與  
於是中外之勢分而事權不一施行不專雖欲寬民  
其道無繇誠使都統司之兵與向者在制置司時無  
異總領所之財與向者在轉運司時無異則內外為  
一體內外一體則寬民力可得而議矣帝從容嘉納  
且勞之曰卿昔安在朕不見卿久矣其以所著書示

朕退以周禮說十三篇上之遷秘書少監兼實錄院  
檢討官嘉王府贊讀紹熙三年除起居舍人明年兼  
權中書舍人

初光宗之始黃氏有寵李皇后妬而殺之光宗既聞  
之而復因郊祀大風雨遂震懼得心疾自是視章疏  
不時於是傳良奏曰一國之勢猶身也壅底則致疾  
今日遷延集事明日阻節某人即有姦險乘時為利  
則内外之情不接威福之柄下移其極至於天變不  
告邊警不聞禍且不測矣帝悟會疾亦稍平過重華  
宮而明年重明節復以疾不往丞相以下至於大學

諸生皆力諫不聽而方召內侍陳源為內侍省押班傳良不草詞且上疏曰陛下之不過宮者特謨有所疑而積憂成疾以至此爾臣嘗即陛下之心反覆論之竊自謂深切陛下亦既許之矣未幾中變以誤為寶而開無端之釁以疑為真而成不療之疾是陛下自貽禍也書奏帝將從之百官班立以俟帝出至御屏皇后挽帝回傳良遂趁上引裙后叱之傳良哭于庭后益怒傳良下殿徑行詔改秘閣修撰仍兼贊讀不受

寧宗即位召為中書舍人兼侍讀直學士院同實錄

院修撰會詔朱熹與在外宮觀傳良言熹難進易退  
內批之下舉朝驚愕臣不敢書行熹於是進寶文閣  
待制與郡御史中丞謝深甫論傳良言不顧行出提  
舉興國宮明年察官交疏削秩罷嘉泰二年復官起  
知泉州辟授集英殿修撰進寶謨閣待制終于家年  
六十七謚文節有詩解詁周禮說春秋後傳左氏章  
指行于世並儒林傳

永嘉薛氏考訂千載允今名士得其說者小之則擅  
場屋之名大可以臨民治軍之際惟公游從最久造  
詣最深以之研精經史貫百氏以斯文為己任綜理

當世之務攷覈舊聞於治道可以興滯補敝復古至  
道條畫本末粲如也本朝名公鉅卿不可縷數然自  
常布而名動宇內者不過數人公自為舉子業其所  
論著如六經論等文所在流播幾於家有其書蜀中  
文學最盛讀之者無不動色文體為公一變至傳入  
夷貊視前賢為尤盛始入太學士無賢不肖斂衽下  
風既登甲科朝野想望風采見樓攻媿文集  
公抱負偉傑類非今人所可企及求之古人亦未易  
多得名高多忌卒不得究其經世之學  
風度高遠動輒過人詩律之精深字畫之道媚登覽

高致吟諷低昂親之則使人意消王謝韻度尚可想也方主上在宮邸時寮寀以詩為壽惟胡善黃公與公之詩皆有諷諫上為置酒各親書所上詩謝之公後嘗奏知以御札登諸石而跋其下以其稿示鑰未及刻而公歸訪求此稿不可復得猶記其畧云季札觀樂歌頌而曰哀而不愁太史公讀虞書至於君臣相救維是幾安未嘗不流涕也成王作頌推已懲艾可不謂戰戰恐懼若守善終哉蓋頌者不專於美盛德之形容皆救戒之義秦斯以來此義殆絕鑰讀之為之感咽於乎此又先儒之所未發也

太學錄闕宰相龔茂良曰臣欲擇取名儒為士林所  
推者上問為誰以公對上曰是朕所素知者命下果  
無異辭

以奏事再入脩門鬚髮如雪丞相留公正一見嘆曰  
幾年陳君舉尚可使外補耶奏留為吏部員外郎初  
對上曰卿去國幾何朕時欲見卿久矣知卿學問深  
醇有所著書進來時上臨朝淵嘿罕有聖語公敬謝  
而退以周禮說進擢秘書少監訓詞曰朕日御便朝  
延見郎吏有郎白首色爽而氣溫儉者贊其名則汝  
傳良也朝列傳誦

溫居瀛壖儒學之淵間氣所鍾挺生斯賢

並樓文集

初講城南茶院時諸老先生傳科舉舊學摩蕩鼓舞  
受教者無異辭公未三十心思挺出陳編宿說披剝  
潰敗奇意芽甲新語懋長士蘇醒起立駭未曾有皆  
相號召雷動從之雖縻他師亦籍名陳氏由是其文  
擅於當世公不自喜悉謝去獨崇敬鄭景望薛士龍  
師友尊之入太學則張欽夫呂伯恭相視遇兄弟也  
公之從鄭薛也以克己兢畏為主敬德集義於張公  
盡心焉至古人經制三代治法又與薛公反復論之  
而呂公為言本朝文獻相承所以垂世立國者然後



學之內外本末備矣公猶不已年經月緯晝驗夜索  
詢世舊繙吏牘蒐斷簡採異聞一事一物必稽於極  
而後止千載之上珠貫而絃組之若目見其身相旋  
其間呂公以為其長不獨在文字也

見葉水心文集

答陳君舉書曰熹自頃寓書之後南來擾擾未能嗣  
音至於懷仰德義則無日而不勤也乃蒙不忘專人  
枉教此意厚矣何感如之垂諭詩說向見二君能道  
梗槩大指畧同意其必有成編故以為請今承語及  
乃知爾雅蟲魚決非磊落人之所宜注也唐突負愧  
如何可言誨示之勤尤荷不鄙然嘗謂人之為學若

從平實地上循序加功則其目前雖未見日計之益而積累工夫漸見端緒自然不假用意裝點不待用力支撐而聖賢之心義理之實必皆有以見其確然而不可易者若熹之愚自信之篤向來之辨雖至於遭說取辱然至于今日此心耿耿猶恨其言之未盡不足以暢彼此之懷合異同之趣而不敢以為悔也不識高明何以教之惟盡言無隱使得反覆其說千萬幸甚老病幽憂死亡無日念此一大事非一人私說一朝淺計而終無面寫之期是以冒致愚悞鄉風引領不勝馳情

前書所扣未蒙開示然愚悃之未能盡發於言者亦多每恨無由得遂傾倒以求錫切近曹器之來訪乃得為道曲折計其復趨函丈必以布露敢丐高明少垂采擇其未然者痛摺擊之庶有以得其真是之歸上不失列聖傳授之統下使天下之為道術者得定

于一非細事也惟執事圖之

並見晦菴文集

陳傳良周禮說一卷

見宋史藝文志

陳傳良春秋後傳十二卷又左氏章指三十卷

陳傳良漢兵制一卷備邊十策九卷

陳傳良止齋集五十三卷

陳傅良建隆編一卷一名開基事要

陳傅良兩漢史鈔十七卷

並藝文志

陳君舉周禮說三卷陳氏曰其書曰格君心正朝綱均國勢各四篇中興藝文志稱傅良之言曰周官之綱領三養君德正朝綱均國勢也鄭註之誤三王制漢儒之言今以釋周禮司馬法兵制今以證田制漢官制皆襲秦今以比周官徐鉉學於傅良記所以授而為書曰微言傅良為說十二篇專論綱領見文通止齋春秋後傳左氏章指共四十二卷陳氏曰陳傅良撰樓參政鑰為之序大畧謂左氏存其所不書以

實其所書公羊穀梁以其所書推見其所不書而左氏實錄矣此章指之所以作也若其他發明多新說序文畧見之

建隆編一卷陳氏曰陳傳良撰蓋長編大祖一朝節略也隨事敘訂併及累朝之始末慶元初在經筵上讀書譜一卷陳氏曰陳傳良撰自伏羲迄春秋終以書詩春秋諸經考世代而附著之共和而下始有年數

止齋集五十二卷陳氏曰中書舍人永嘉陳傳良君舉撰三山本五十卷並文獻通考

陳傳良續通鑑節要十卷

見玉海

吳徵學統教法一曰經學春秋凡三家陳止齋後傳

附三傳凡二家止齋章指附

見吳草廬文集

蔡文懿

蔡幼學字行之温州瑞安人

見宋史儒林傳

年十八試禮部第一是時陳傳良有文名于太學幼

學從之游月書上祭酒芮燾及呂祖謙連選拔輒出

傳良右皆謂幼學之文過其師孝宗聞之因策士將

寘首列而是時外戚張說用事宰相虞允文梁克家

皆陰附之幼學對策其略曰陛下資雖聰明而所存

未大志雖高遠而所趨未正治雖精勤而大原不立  
即位之始異太平旦暮至奈何今十年風俗日壞將  
難扶持紀綱日亂將難整齊人心益搖將難收拾吏  
慢兵驕財匱民困將難正救又曰陛下耻名相之不  
正更制近古二相並進以為美談然或以虛譽或聽  
自許立功或以緘默容身不能持正蓋指虞允文梁  
克家也又曰漢武帝用兵以來大司馬大將軍之權  
重而丞相輕公孫弘為相衛青用事弘苟合取容相  
業無有宣元用許史成帝用王氏哀帝用丁傅率為  
始元之禍今陛下使姨子領兵柄其人無一才可取

華

宰相忍與同列曾不差恥按其罪名宜在公孫弘上  
蓋指張說也帝覽之不懌虞允文尤惡之遂得下第  
執政薦于朝帝許之且問年幾何矣何以名幼學叅  
政施師點舉孟子幼學壯行之語以對上佇思慨然  
曰今壯矣可行也遂除敕令所刪定官首言大耻未  
雪境土未復陛下睿智神武可以有為而苟且之議  
委靡之習顧得以緩陛下欲為之心孝宗喜曰解卿  
意欲令朕立規模爾

光宗以疾不朝重葉宮幼學上封事曰陛下自春以  
來北宮之朝不講比者壽皇愆豫侍從臺諫叩陛請



對陛下拂衣而起相臣引裾群臣隨以號泣陛下退  
朝宮門盡閉大臣累日不獲一對清光望日之朝都  
人延頸遷延至午禁衛飲恨市塵軍伍謗誹籍籍旁  
郡列屯傳聞疑怪變起倉卒陛下實受其禍誠思身  
體髮膚壽皇所與宗社人民壽皇所命則嚆昔慈愛  
有感乎心可不獨出聖斷復父子之歡弭宗社之禍  
疏入不報

寧宗即位詔求直言幼學又奏陛下欲盡為君之道  
其要有三事親任賢寬民而其本莫先於講學此年  
小人謀傾君子為安靖和平之說以排之故大臣當

興治而以生事自疑近臣當效忠而以忤旨擯棄其  
極至於九重深拱而群臣盡廢多士盈庭而一籌不  
吐自非聖學日新求賢如不及何以作天下之才自  
熙寧元豐而始有兌役錢有常平積剩錢有無額上  
供錢自大觀宣和而始有大禮進奉銀絹有瞻學糴  
本錢有經制錢自紹興而始有和買折帛錢有總制  
錢有月椿大軍錢至於茶鹽酒榷稅契頭子之屬積  
累增多較之祖宗無慮数十倍民困極矣幼學既論  
列時政其極歸之聖學帝稱善將進用之時韓侂胄  
方用事指正人為偽學異論者立黜幼學遂力求外

補

朱熹居建陽幼學每事咨訪遂為御史劉德秀劾罷  
奉祠者凡八年起知黃州改提點福建路刑獄未行  
有勸侂冑以收召海內名士者乃召幼學為吏部員  
外郎入見言高宗建炎間減婺州和買絹折羅事因  
輸輔臣曰一日行得如此一事一年不過三百六十  
事而已陛下除兩浙丁錢視高宗無間然而兵事既  
開諸路罹鋒鏑轉餉之艱江湖以南有調募科需之  
擾惟陛下以愛惜邦本為念遷國子司業宗正寺卿  
皆兼權中書舍人侂冑既誅餘黨尚窒正路幼學次

第彈繳竄黜九衆號稱職

嘉定初同樓鑰知貢舉時正學久錮士專於聲律度  
數具學支離幼學始取義理之文士習漸復於正兼  
直學士院內外制皆溫博雅厚得體人多稱之

趙師畢除知臨安府畢薛故事當有不允詔幼學言  
師畢以媚權臣進官三尹京兆狼籍無善狀詔必出  
褒語臣何辭以革命遂寢改兼侍讀師畢命乃下

進福建路安撫使政主寬大惟恐傷民福建下州例  
抑民買鹽以戶產高下均賣者曰產鹽以交易契紙  
錢科敷者曰浮鹽皆出常賦外久之遂為定賦幼學

力請蠲之不報提舉司令民以田高下藏新會子不如今者籍其貲幼學曰罔民而可吾忍之乎惟有去而已因言錢幣未均秤提無術力求罷去

先是朝廷既遣歲帛入金境適值其有難不果納則遽以兵叩邊索之中外洶洶皆言當亟與幼學請對言玉帛之使未還而侵軼之師奄至且肆其侮慢形之文辭天怒人憤可不伸大義以破其謀乎於是朝論奮然始詔與金絕幼學因請固本根以弭外虞示意向以定衆志公汲引以合材謀審懷附以一南北帝稱善

幼學早以文鳴于時而中年述作益窮根本非關教化之大由情性之正者不道也器質凝重莫窺其際終日危坐一語不妄發及辯論義理縱橫闡沛然如決江河雖辨士不及也嘗續司馬光公卿百官表年曆大事紀備志辨疑編年政要列傳舉要凡百餘篇傳于世

並儒林傳

公雖幼以文顯無浮巧輕艷之作既長益務闡教化養性情花卉之炫麗風露之淒爽不道也詞命最溫厚亦不自矜貴惟於國史研貫專一朱墨義類刊閏齊整各就書法為續司馬公卿百官表年曆大事記

備志辨疑編年政要列傳舉要等百餘篇今代之完  
書也天資凝重危坐竟日或不通一詞龍窟陳同甫  
言吾嘗與陳君舉極論往往擊牴案聲撼林木行之  
在旁邈若無聞吾頗訥之衆亦云素無短長於間也  
一日夜盡散忽語吾道一爾奚皇帝王霸之云吾方  
辨數而行之橫啓縱闔援今證古釐為十百聚為一  
二抵夜接日若懸江河吾謝不能乃已則復不言默  
默如故故雖並舍連榻不知也然則昔人謂得人於  
眉睫定士於俄頃亦豈盡然歟盖公之中深隱厚可  
驗於是矣

見水心  
文集

蔡幼學育德堂集五十卷

見宋史藝文志

蔡幼學宋編年政要四十卷又宋實錄列傳舉要十

二卷

蔡幼學續百官公卿表一十卷又續百官表質疑十

卷

並宋史藝文志

育德堂外制集八卷內制集三卷陳氏曰兵部尚書  
永嘉蔡幼學行之撰成童穎異從同郡陳傳良君舉  
學治春秋年十七試補上庠皆選陳反出其下明年  
陳改用賦冠監舉而幼學經魁又明年省闈先多士  
而陳傳良亦為賦魁一時師弟子雄視場屋莫不歆



美通見文獻  
考獻

蔡幼學皇朝宰輔拜罷圖一卷建隆元年至紹熙五  
年宰執拜罷月日為圖年經而官緯觀玉

蔡幼學為續公卿百官表年曆大事記備志辨疑編  
年政要列傳舉要等百餘篇表凡二十卷質疑十卷  
自治平迄紹興五年

蔡幼學國朝編年政要四十卷起建隆止靖康記政  
事大略其體皆編年法惟每歲先列宰執拜罷為異  
又國朝贊銀列傳舉要十二卷起國初止神宗並見  
玉海